



398

399

Broj: 11-05-38-307-5/19
Sarajevo, 05.02.2019. godine

07-02-2019

SKUPŠTINA KANTONA SARAJEVO

PREDMET: Odgovor na zastupničko pitanje, br: 01-05-39122-38/18 od 24.12.2018. godine
dostavlja se

PITANJE: Zastupnik u Skupštini Kantona Sarajevo, Senad Hasanović, na Prvoj radnoj sjednici Skupštine Kantona Sarajevo, održanoj dana 19.12.2019. godine, u okviru tačke Dnevnog reda „Poslanička pitanja, inicijative i odgovori“, postavio je sljedeće zastupničko pitanje:

„Zašto su diplomanti i magistranti Medicinskog fakulteta prilikom dodjela diploma odvojeni od ostatka akademske zajednice i ko će preuzeti odgovornost što su za disonantne tonove između uprave Medicinskog fakulteta i senata Univerziteta UNSA s druge strane, cijenu platili studenti. Da li je i šta resorno ministarstvo poduzelo povodom samoinicijativnih odluka Medicinskog fakulteta o izdvajanju iz UNSA, pošto je ista ozbiljna prijetnja za započeti proces integracije Univerziteta“.

ODGOVOR: Ministarstvo za obrazovanje, nauku i mlade Kantona Sarajevo je zastupničko pitanje Hasanović Senada prosljedilo na izjašnjenje Medicinskom fakultetu Univerziteta u Sarajevu koji je ovom ministarstvu dostavio akt broj: 01-3-424/19 od 18.01.2019. godine, koji vam u prilogu dostavljamo.

S poštovanjem,



MINISTRICA

Mr. [REDACTED]

Prilog: Kao u tekstu

Dostaviti:

1. Naslovu,
2. Stručna služba Vlade Kantona Sarajevo
3. a/a





Broj: 01-3-424/19

Sarajevo, 18.01.2019. godine

KANTON SARAJEVO

Ministarstvo za obrazovanje, nauku i mlade

N/R gđa. Zineta Bogunić, ministar

Reisa Džemaludina Čauševića 1

71000, Sarajevo

18-01-2019

Predmet: Odgovor na dopis broj: 01-3-307/19, od 15.01.2019. godine

Poštovana,

Shodno Vašem dopisu broj: 01-3-307/19 od 15.01.2019. godine u vezi dostavljanja izjašnjenja na zastupničko pitanje zastupnika u Skupštini Kantona Sarajevo Senada Hasanovića, koje glasi: „*Zašto su diplomanti i magistranti Medicinskog fakulteta prilikom dodjela diploma odvojeni od ostatka akademske zajednice i ko će preuzeti odgovornost što su za disonantne tonove između uprave Medicinskog fakulteta i senata Univerziteta u Sarajevu s druge strane, cijenu platili studenti. Da li je i šta resorno ministarstvo poduzelo povodom samoinicijativnih odluka Medicinskog fakulteta o izdvajanju iz UNSA, pošto je ista ozbiljna prijetnja za započeti proces integracije Univerziteta*“, dostavljamo Vam slijedeće odgovore:

PRVI DIO PITANJA

1. Hipokratova zakletva je već 2,500 godina izvorna tačka svih ljekarskih zakletvi i kodeksa, a polaganje zakletve je važan ritual pri stupanju u ljekarsku profesiju koji se obavlja kao dio diplomske ceremonije po završetku medicinskih studija.

Hipokratova zakletva se smatra važnim činom u profesiji koja je posvećena najplemenitijim ciljevima i moralnim idealima. Polaganje iste Hipokratove zakletve (Ženevske deklaracije/zakletve) je međunarodno prihvaćena konvencija, praksa i običaj koji se koriste u cijelom svijetu otkad postoje škole za ljekare.

Modifikovani tekst originalne Hipokratove zakletve je 1948. godine je prihvaćen od strane Opće skupštine Svjetskog liječničkog udruženja (WMA, engl. World Medical Association).

2. Univerzitet u Sarajevu je promijenio tekst Hipokratove zakletve bez prethodnog dogovora sa upravom i studentima Medicinskog fakulteta. Tim činom Univerzitet u Sarajevu je izdvojio studente ovog Medicinskog fakulteta od svih drugih studenata medicine u svijetu.

Zadnje dvije godine Medicinski fakultet je pokušavao pronaći kompromis sa Rektoratom Univerziteta u Sarajevu i nudio različite prijedloge, no Univerzitet u Sarajevu nije pristao ni na jedan. Za promociju diplomanata akademske 2017/2018. godine, Rektorat Univerziteta u Sarajevu je odbio čak i da razmatra prijedlog Naučno-nastavnog vijeća Medicinskog fakulteta

na sjednici Senata da ljekari/doktori medicine polažu neizmijenjenu Hipokratovu zakletvu i insistirao na primjeni izmišljene, tzv. 'profesionalne zakletve', koju trebaju zajedno polagati studenti (diplomanti) medicine, farmacije, stomatologije, zdravstvenih studija i veterine, što se ne radi nigdje u svijetu.

3. Po saznanju o neprihvatanju prijedloga Medicinskog fakulteta, diplomanti (doktori medicine) su samoinicijativno donijeli odluku o nedolasku na svečanu promociju i dodjelu diploma diplomantima i magistrantima u Zetri, 01.12.2018. godine, zahtijevali organizaciju posebne promocije i o tome obavijestili Nastavno-naučno vijeće Medicinskog fakulteta.

Čitava situacija se mogla izbjeći produženjem zajedničke ceremonije za samo pet minuta, u toku kojih bi studenti medicine položili svoju zakletvu, što Univerzitet u Sarajevu nije prihvatio.

4. Naučno-nastavno vijeće Medicinskog fakulteta smatra da je prilagođeni tekst profesionalne zakletve (koji je pročitao na Svečanoj ceremoniji u Zetri, 01.12.2018. godine) neprihvatljiv za ljekare/doktore medicine, jer se u njemu ne spominje ljudski život, te da su ljekari/doktori medicine u profesionalnoj obavezi da polažu Hipokratovu zakletvu, zbog čega Vijeće Medicinskog fakulteta nikada nije usvojilo tekst tzv. "profesionalne zakletve".

Na 14. redovnoj sjednici Naučno-nastavnog vijeća Medicinskog fakulteta održanoj 21.11.2018. godine, predstavnici studenata predložili su da se organizuje posebna promocija diplomiranih studenata akademske 2017/2018. godine, što je Naučno-nastavno vijeće prihvatilo. Također, članovi Vijeća iz reda predstavnika studenta su smatrali da da bi se jedinstveni čin (za ljekarsku profesiju) mogao održati na intimniji, dostojanstveniji i svečaniji način, čime bi bilo i omogućeno prisustvo većeg broja članova porodica diplomanata. Od osnivanja Medicinskog fakulteta i Univerziteta, zasebne promocije diplomiranih studenata su se po fakultetima organizovale daleko češće od zajedničkih, i takva praksa nikad nije smatrana međusobnim odvajanjem.

Činom prisustvovanja posebnoj svečanoj ceremoniji uručjenja diploma, diplomanti/doktori medicine akademske 2017/2018. godine nisu oštećeni, već su se vrlo pohvalno izjasnili o istoj.

DRUGI DIO PITANJA

Inicijativa Medicinskog fakulteta za osnivanje medicinskog univerziteta je potpuno zakonita i zasniva se na istom zakonu koji uređuje integraciju Univerziteta. Sve je više primjera postojanja zasebnih medicinskih univerziteta, jer je dokazano da je zbog specifičnosti ove vrste studija takav model organizacije najbolji. Osnivanje javnog Medicinskog Univerziteta ne bi proizvelo dodatnu štetu i troškove za društvenu zajednicu nego bi, naprotiv, smanjilo troškove studiranja, poboljšalo i pojednostavilo uslove rada studenata, te unaprijedilo kvalitet studija. Medicinski fakultet smatra da nema posebnih razloga zbog kojih bi inicijativa za osnivanje Medicinskog Univerziteta trebala izazvati otpor ili uznemirenost, jer se tim činom ne bi poremetio rad postojećeg Univerziteta ili njegov značaj, niti bi se pojavila potreba za većim budžetskim sredstvima, ali bi se sa druge strane pojednostavilo poslovanje vrlo kompleksnog postojećeg Univerziteta i omogućila koncentracija kvaliteta uz mogućnost uvođenja novih, potrebnih i tržišno vrlo traženih programa studija.

Osnivanje javnog medicinskog univerziteta nije ni na koji način prijetnja procesu integracije Univerziteta u Sarajevu. Univerzitet u Sarajevu je probio sve zakonske rokove u postupku

integracije, a da Medicinski fakultet pri tome nije poduzeo nijednu radnju koja bi te procese usporila, nego je samo najavio inicijativu za osnivanje novog univerziteta, kad se stvore zakonski uslovi, i kad ta inicijativa bude obrazložena i prihvaćena na zakonom utvrđen način.


S druge strane, smatramo da bi veću štetu Univerzitetu u Sarajevu nanijelo pripajanje i nestanak Medicinskog fakulteta u započetom procesu integracije, pa izdvajanje dijelova Univerziteta kad se stvore uslovi za osnivanje i početak rada medicinskog univerziteta.

- c) Disonantne tonove koji se u zastupničkom pitanju spominju nije prouzrokovao Medicinski fakultet nego je ovaj fakultet, naprotiv, učinio sve da se bilo koja neriješena međusobna pitanja riješe unutar akademske zajednice. Nikakva šteta nije nanešena studentima čiji su predstavnici na Naučno-nastavnom vijeću u više navrata pohvalno govorili o naporima Fakulteta da potpuno zaštiti nastavni proces.

Shodno navedenom, u prilogu Vam dostavljamo: Zaključak broj: 01-4-TK-836/18 od 21.11.2018. godine o polaganju Hipokratove zakletve – Ženevske zakletve/deklaracije – čiji tekst je 1948. godine u Ženevi prihvaćen od strane Opće skupštine i Svjetskog liječničkog udruženja (WMA, engl. World Medical Association), Zaključak Naučno-nastavnog vijeća Medicinskog fakulteta broj: 01-4-TK-8366/18, od 21.11.2018. godine o usvajanju prijedloga da se podjela diploma i polaganje Hipokratove zakletve (Ženevske zakletve/deklaracije) diplomantima Medicinskog fakulteta Univerziteta u Sarajevu za studijsku 2017/18. godinu održi u prostorijama Medicinskog fakulteta, ukoliko Rektorat Univerziteta u Sarajevu odbije prijedlog Naučno-nastavnog vijeća Medicinskog fakulteta da doktori medicine polažu Hipokratovu zakletvu tokom održavanja Centralne svečane ceremonije u Zetri – planirane za 01.12.2018. godine, Zaključak Naučno-nastavnog vijeća Medicinskog fakulteta Univerziteta u Sarajevu o usvajanju prijedloga da se čin podjele diploma i polaganje Hipokratove zakletve (Ženevske zakletve/deklaracije) diplomantima Medicinskog fakulteta Univerziteta u Sarajevu za studijsku 2017/18. godinu održi u sali Bosanskog kulturnog centra, u nedjelju 23.12.2018. godine, kako bi se omogućilo prisustvo većeg broja članova porodica diplomanata. U prilogu Vam također dostavljamo i print verziju web objava na stranici Fakulteta:

1. „Zaključci Nastavno-naučnog vijeća Medicinskog fakulteta Univerziteta u Sarajevu od 21.11.2018. godine“
2. „Promocija diplomanta Medicinskog fakulteta Univerziteta u Sarajevu za studijsku 2017/18. godinu“
3. „Saopćenje za javnost povodom svečane promocije diplomanata i magistranata Univerziteta u Sarajevu (Zetra 01.12.2018. godine)“

Bilo bi nam zadovoljstvo da uvaženi zastupnik Hasanović, sam ili sa kolegama, posjeti Medicinski fakultet gdje bi mogao dobiti još potpunije odgovore na ova ili druga pitanja, i uvjeriti se da ovaj Fakultet djeluje efikasno i organizovano u nauci i nastavi.

S poštovanjem,

dr. Semra Cavaljuga

Dostavljeno:

- Naslov
- a/a